

Las historias e las legendas vegnevan raquintadas vinavon

1. *Mintga scolara e mintga scolar raquenta vinavon alla classa ina historia ch'ella/el ha udiu.*

Proceder:

Spitgei en ina stanza dasperas duront che la scolasta/il scolast raquenta ad ina scolara/ina dallas legendas che suondan!

Ussa raquenta quel/quella la legenda udida ad in auter scolar entraus en stanza da scola (secapescha senza mirar sil text). Quel raquenta puspei ad in auter ...

Aschia vegn la legenda raquintada vinavon tochen che mintga scolara e mintga scolar ha udiu e raquintau ella.

2. *Discutei en classa e nudei co la legenda ei settransformada cun raquintar vinavon!*

Sogn Gagl egl uaul d'Arbon

Sogn Gagl e Hiltibold spassegian tras igl uaul. Els ein alla tscherca d'in plaz adattau per in oratori. Viers sera arrivan els en in liug nua che la Steinach sburfla tras ina cavorgia e fuorma giu ella val in laghet. Hiltibold pren ina reit ord sia tastga, betta quella ell'aua e peglia enzacons pèschs. Allora petga el sbrenzlas cun in crap da fiug, envida in fiug ed entscheiva a preparar ina tscheina.

Denton va sogn Gagl in techet dalla vart per urar. El scarpetscha sur spinatschs e croda. Hiltibold cuora neutier per gidar el en pei. Il sogn refusa denton igl agid cun ils plaids: „Diu ha dau a mi in segn che jeu dueigi restar en questa cuntrada.“ Allora ligia el dus fests-coller ad ina crusch e penda vida quella ina capsla cun reliquias. Sin quei maglian ils dus umens lur tscheina, stezzan allura il fiug e semettan a ruaus.

Cheu s'avischina in uors, sgnufla entuorn e maglia si las restonzas dalla tscheina. Sogn Gagl peglia buca tema, mobein camonda agl uors en num da Diu dad ir per lenna e da fierer quella el fiug. Igl uors fa immediat per camond, trotta naven e retuorna prest cun in romun ch'el fiera el fiug. Sogn Gagl dat agl uors in paun sco engraziament. Allora camonda el agl uors: „En num da miu Segner Jesus Kristus, va naven da quei liug! Ti sas viver ellas muntognas e sin ils crests, mo cheu ella val dueis ti blessar ni carstgaun ni muvel!“ Igl uors va naven.

Hiltibold ei fetg surprisus, sebetta giu avon ils peis da sogn Gagl ed excloma: „Ussa sai jeu ch'il Segner ei cun tei, perquei ch'ils animals digl uaul fan per camond a ti.“

Sogn Glieci ed igl uors

In di fa sogn Glieci in paus sin in crest sur via ella regiun dil "Luziensteig". Ina dunna zuppegia cun stenta per via. Sin siu dies gob porta ella in fasch lenna. Sogn Glieci stat mal per la dunna. El cuora egl uaul e retuorna cun in uors. Allora metta el la carga agl uors si dies e camonda a quel da purtar la lenna senza murmignar en la camona dalla dunna. Igl uors fa per camond. E la consequenza: La dunna daventa l'emprema cristiana dalla regiun.

Pensums supplementars

- *Sogn Glieci, la dunna ed igl uors – dessegna questa scena!*
- *Retscherca, sch'ei dat aunc ozildi missiunaris che portan ina religiun en autras tiaras.*